

四庫全書

史部

欽定四庫全書

禮部志稿卷三十二

明 俞汝楫 編

祠祭司職掌

皇太后喪禮

正統七年誠孝皇太后喪禮

遺詔

喪服以日易月二十七日而除哭臨三日即止君臣皆

同皇帝成服三日後即聽政天地宗廟社稷及百神之
祀皆勿停宗室諸王但遣官進香不必送喪在外大小
文武衙門並免進香臣民之家勿禁音樂嫁娶

部議

一自聞喪日為始不鳴鼓鐘一諸王世子郡王及王妃
郡主以下聞訃皆哭盡哀行五拜三叩頭禮畢易素服
第四日始哀服二十七日而除一在京文武官聞喪素
服烏紗帽黑角帶自明日始至第三日每旦詣思善門

外哭退於本衙門宿歇不飲酒食肉第四日具斬衰服
至思善門外朝夕哭臨三日各十五舉聲止凡入朝及
在外衙門視事用布裏紗帽素服腰經麻鞋退即服哀
服通前二十七日而除一文武官一品至四品命婦麻
布大袖圓領長衫蓋頭清晨縣西華門入至思善門外
哭臨三日悉去金銀首飾仍素服二十七日而除一在
京以聞喪日為始禁屠宰十三日一軍民素服婦人素
服不妝飾俱以聞喪日為始二十七日而除一外國四

夷使臣行哭臨禮工部造與孝服隨朝官哭臨及行祭
禮一在京文武官非朝參官及聽選辦事官監生吏典
耆老僧道聞喪即易素服自次日至第三日每旦赴順
天府朝闕設香案哭臨至第四日官各具斬哀服監生
人等素服朝夕哭臨三日各十五舉聲止仍各素服通
前二十七日而除一遺詔到日在外文武官員人等素
服烏紗帽黑角帶行四拜禮跪聽宣讀訖舉哀再行四
拜禮畢各置斬哀服于衙門內望闕設香案朝夕哭臨

三日各十五舉聲止自是素服通計二十七日而除一
在外官員命婦聞喪素服舉哀三日各十五舉聲素服
通前二十七日而除軍民男女各素服十三日一南京
文職二品武職三品以上衙門在外中都留守司布政
司按察司及總兵官差人進香其餘衙門皆免

嘉靖十七年上章聖皇太后慈諡儀

前期四日太常寺奏齋戒三日至日遣官奏告天地宗
廟社稷用祝文香帛酒果醢醢如常儀是日早告儿筵

設冊寶案於几筵前冊東寶西設祝案於御拜位右祭前一日內侍官置冊寶輿香亭於奉天門捧冊寶各置輿中是日上素冠服御奉天門內侍官舉輿外導駕官導上隨冊寶輿後降階升輅外導駕官退百官素服於金水橋南北向立冊寶輿將至百官皆跪冊寶輿過興隨至慈寧宮門外北向立太常寺導引官導上至慈寧宮門外降輅冊寶輿繇中門進至几筵前丹陛上導引官導上繇左門入至丹墀內贊唱執事官各司其事導

引官導上至丹墀上拜位太常寺官于冊寶輿內捧冊
寶繇殿中門入至几筵前左右北向立內贊奏四拜禮
外鴻臚寺官傳唱百官皆行四拜禮畢導引官導上繇

殿左門入至梓宮前跪奏

傳贊百官皆跪

奏進冊捧冊官以冊

跪進于上右上受冊獻畢以授捧冊官置于案奏進寶
捧寶官以寶跪進於上左上受寶獻畢以授捧寶官置

于案奏宣冊寶訖奏俯伏興平身

傳贊百官同

奏復位導引

官導上至几筵前唱初獻禮奏跪

傳贊百官皆跪

奏獻帛奠酒

贊讀祝讀祝官跪于右讀訖唱亞獻禮終獻禮奏俯伏

興平身

傳贊百官同

奏復位導引官導上繇殿左門出至拜

位奏四拜

傳贊百官同

導引官導上由左門入至梓宮前以

冊寶授太常寺官捧入內導引官導上入內安冊寶行叩頭禮導引官導上繇左門出至丹陛上奏禮畢遂頒詔如常儀

嘉靖十八年章聖皇太后梓宮南祔儀

一先期勅命勲戚重臣一員充奠獻使并護行武職大

臣一員管領官軍扈侍梓宮行禮部堂上官一員監禮
扈行題主大臣一員護喪內侍官并入皇堂內官內使
匠作太常少卿一員執事官十人鴻臚寺少卿一員屬
官等十人光祿寺少卿一員四署官四人錦衣衛指揮
一員千百戶四人各供事給事中御史各二員監視糾
察欽天監官一員率博士一員安葬候時五府九卿等
衙門分官奉送梓宮俱照欽點職名各送至張家灣水
次恭祭而回工部委官會同內官監先期于通州及張

家灣水次二處搭蓋奉安梓宮席殿及朝陽門至通州
各處祭所席棚及行文沿途府州縣各該有司預于水
次搭蓋祭所席棚一前期二日百官及皇親命婦文武
官三品以上命婦俱哀服每日早詣慈寧宮門外哭臨
命婦設祭一壇免朝禁屠宰音樂至神主回京日止一
前期六日以皇妣祔葬顯陵祭告太廟睿宗廟遣官分
告列聖羣廟越二日上吉服告天神地祇壇祭品行禮
俱如常儀百官陪拜又二日上預告凡筵內侍官陳設

牲醴如常儀上具哀服內導引官導上詣拜位奏四拜
奠帛三奠酒讀祝俯伏舉哀哀止奏四拜興焚祝帛禮
畢一設奠辭靈昭聖皇太后遣祭一壇武廟皇妃一壇
皇后一壇皇妃皇嬪各一壇皇太子一壇裕皇景王仁
和大長宮主等一壇涇簡王妃一壇內宮內使共一壇
是日遣官祭告各門及諸神廟慈寧門思善門右順門
午門端門承天門御橋大明門俱遣內官行禮玉河橋
朝陽門并橋關王廟顯靈宮靈濟宮城隍廟東嶽廟真

武廟俱遣太常寺官行禮祭用酒果脯醢香帛司禮監
禮部錦衣衛提督執事者設大昇輿于午門外至大明
門外一啟奠內侍官陳設酒饌拜位如常儀內導引官
導上具哀服詣拜位奏拜奠讀祝舉哀禮畢內侍官跪
奏請慈孝顯皇后梓宮陞龍輅內侍官先捧謚冊寶繇
殿中門出置輿內次捧桑主繇中門出奉安輿內次香
亭安置訖內侍官捧銘旌繇中門出梓宮降殿執事官
奉登龍輅訖以綵色帷幕障飾梓宮執轎者分列左右

內使擎執繖扇侍衛如常儀

儀仗用存日所御者

謚冊寶輿香亭

銘旌以次先行上至梓宮前跪內侍官跪奏謹請皇妣
靈駕進發上縣殿左門出宮眷皆哭後隨至午門內侍
官跪奏請靈駕安止安定行祖奠禮一祖奠內侍官陳
設酒饌拜位如常儀內導引官導上哀服拜奠讀祝舉
哀畢內侍官跪奏請靈駕進發執事者進大昇輿奉安
訖遂行上率宮眷隨至端門外行朝祖禮一朝祖欽定
捧主官九員俱具青服恭捧各廟主詣太廟奉安訖太

常寺陳設脯醢酒果於列聖位前不奠獻執事官先設
褥位於太廟丹陛正中梓宮至端門外上具青服太常
寺導引官導上詣桑主輿前跪太常寺卿跪于上之左
奏請慈孝獻皇后朝祖上捧桑主繇太廟中門入至太
廟丹陛上立典儀唱迎神各捧主官上香退典儀唱行
朝祖禮太常卿進立於殿中北向內贊奏跪上捧桑主
跪奉于褥位內贊奏謁辭太常卿跪奏曰孝玄孫嗣皇
帝某謹奉慈孝獻皇后謁辭訖內贊奏四拜禮興平身

上跪捧桑主起立太常卿跪奏曰禮畢請還宮捧主官
納主還各廟上捧桑主退至陞東西面立隨列聖主後
出安亭內行辭奠禮一辭奠先期太常寺官于承天門
內陳設牲醴如奠儀內侍官設上拜位設宮眷帷幕于
近西桑主朝行禮畢上易哀服太常寺導引官導上詣
拜位內贊奏上香奏二拜典儀唱奠帛三獻讀祝俯伏
舉哀哀止奏二拜焚帛祝禮畢上退宮眷入拜哭盡哀
止太常寺官跪奏請靈駕進發上攀送而還宮眷俱還

司禮監禮部錦衣衛官提督興寧儀衛等以次前行梓
宮出承天門大明門轉東繇朝陽門出大樂鼓吹前導
設而不作一遣奠先期太常寺執事官于朝陽門外陳
設牲醴如常儀梓宮至太常寺導引官引奠獻使詣拜
位行四拜禮奠帛奠酒讀祝俯伏舉哀哀止贊四拜興
焚祝帛禮畢太常寺官詣梓宮前跪奏請一路祭公侯
伯五府九卿等衙門官員耆老人等共祭一壇朝陽關外五里
僧道官共一壇通州皇親及駙馬共祭一壇各衙門奉送

梓宮官員一壇

俱張家灣

一京城至張家灣沿途市巷軍民

男婦遇梓宮至皆跪俯伏舉哀候梓宮過興一大昇輿
行沿途校尉舁送選委內官同錦衣衛官專一提督務
要起止有節行步安穩送葬官員人等不許逼近儀仗
失次喧嚷有失禮儀者聽糾儀官舉奏一題主前期內
侍官設神座香案于通州席殿內靈駕至奉安訖奠獻
使行上食禮畢退執事官陳設祭品設題主案于香案
前西向奉桑主置案上奠獻使具青服百官俱釋哀具

青服陪拜太常寺官引使就拜位贊三上香訖贊四拜
興退百官分侍左右題主官盥手西向立恭題訖內侍
官捧主奉安神座命官青服行降神禮一降神典儀唱
執事官各司其事贊就位贊上香復位贊四拜

百官唱同

奠帛行初獻禮獻爵讀祝亞獻終獻贊四拜焚祝帛禮畢
太常寺官跪奏請慈孝獻皇后神主降座升輿命官捧
主升輿還京內侍官捧桑主用白鞫櫃靈駕行內執事
官焚楮駕玄儀於野一次日神主回京內執事官備儀

衛教坊司大樂鼓吹前導至道中行饗神禮命官具青

綠錦繡服色

百官同

典儀唱執事官各司其事贊就位贊

上香復位贊四拜

百官同

唱奠帛行初獻禮獻爵讀祝亞

獻終獻贊四拜焚祝帛禮畢神主輿行至朝陽門命官

具吉服隨行

百官同

至午門外儀衛等退內導引官導神

主入上具常服率皇子宫眷等迎神主于慈寧宮門外

武廟皇妃公主涇簡王妃等迎于宮內俱吉服神主至

几筵殿內上立於殿東稍南向皇后皇妃以下序立

於殿西稍南東向內侍官詣靈輿前跪奏請慈孝獻皇后神主降輿陞座畢上捧神主奉安于靈座訖行安神禮內執事官陳設牲醴如常儀內導引官導上詣拜位奏拜奠讀祝禮畢后妃以下入行四拜禮鴻臚寺官引百官于慈寧宮門外隨班行禮

傳贊
如儀

一神主輿行奠獻

使等官行叩頭禮上食畢太常寺官跪奏奉請梓宮啟行至張家灣奉梓宮登舟奉安訖行祭告禮太常寺官陳設奠獻使行禮如常儀各衙門奉送官俱陪拜祭畢

舟發沿途每日三上食奠獻等官俱素冠服詣梓宮前行叩頭禮如常儀神宮監尚膳監恭辦上食饌五樣蔬果酒膳一經過有王府去處許王素服出迎致祭該府官預陳設祭物於水次席殿其附近王府許遣輔導官致祭行禮一南京守備文武衙門各處鎮巡三司官梓宮舟經及附及去處俱致祭舉哀與王府遣官同所轄有司大小官員通許陪拜致祭品物簠盤一座豕一羊一果五盤點心五盤飽燂五盤

俱用顏
色紙花

案酒五樣菜五

磔粉湯五盃飯五盃帛一疋酒三爵香燭紙

陳設如儀

一梓

宮自通州登舟抵承天府張家灣祭潞河之神天津祭海口之神安平鎮祭龍王之神徐州呂梁二處祭洪神淮河口祭淮瀆之神儀真南京祭大江之神彭澤祭小孤山之神九江之神漢江之神所過大川俱用牲醴致祭俱勳臣具青服行禮其各處應祀水府之神開載未備者臨期斟酌致祭

顯陵合葬儀

一先期遣官祭告顯陵光祿寺官陳設牲醴百官陪拜如儀一舟至承天府太常寺官陳設祭告牲醴如儀百官俱衰服奉迎梓宮升席殿奉安訖奠獻使行祭告禮師生耆老人等俱隨班拜奠獻使先詣睿宗舊寢所行禮畢奉遷睿宗梓宮安于稜恩殿復詣聖母梓宮前候發執事官先陳龍輜于稜恩殿門外候大昇輿至太常官詣前跪奏請靈駕降輿升龍輜詣稜恩殿執事官奉梓宮升龍輜由中門入奠獻使由左門入詣稜恩殿奉

安訖謚冊寶輿仍設于前一安神執事官陳設酒饌如
常儀設奠獻使拜位于二聖梓宮前內侍官引奠獻使
詣拜位行禮執事撫按等官陪拜一以合葬祭告后土
并純德山之神陳設牲醴如常儀一遷奠執事官陳設
酒饌如常儀奠獻使詣拜位舉哀行禮退後掩玄宮時
至太常官引詣二聖梓宮前跪太常官奏請靈駕赴玄
宮奠獻使俯伏興執事官升奉遷二聖梓宮進皇堂奉
安訖太常官同內侍官奉謚冊寶置于前陳列冥器等

畢行贈禮一贈禮內執事官陳設酒饌于皇堂門外奉
玉帛置于案奠獻使詣拜位贊四拜奠酒受玉帛獻畢
以授內執事捧入皇堂安置訖俯伏興贊四拜舉哀興
贊贈事畢遂掩玄宮行享禮執事官陳牲醴于玄宮前
如常儀太常官引使詣拜位行禮百官陪拜一掩玄宮
畢太常寺官同內侍官恭拜桑主并魂帛奉藏於玄堂
外遣官祭謝后土并純德山之神陳設酒饌如常儀

禮同

祭奠獻使執事等官回京復命

皇后喪禮

洪武十五年高皇后喪禮

一聞喪次日文武百官素服行奉慰禮一在京文武百官於聞喪之四日清晨喪服詣右順門外具喪服入哭臨畢素服行奉慰禮三日而止一文官一品至三品武官一品至五品命婦于聞喪之四日清晨素服至乾清宮具喪服入臨行禮不許用金珠銀翠首飾及施脂粉喪服用麻布蓋頭麻布衫麻布長裙麻布鞋一在京文

武百官及聽除等官人給布一疋自製喪服一文武官員皆服斬衰自成服日為始二十七日而除仍素服至百日始服淺淡顏色衣服一在外文武官喪服與在京官同聞訃日于公廳成服三日而除命婦喪服與在京命婦同亦三日而除一軍民男女皆素服三日一自聞訃日為始在京禁屠宰四十九日在外三日停音樂祭祀百日停嫁娶官一百日軍民一月一上冊諡祭告太廟一發引文武百官具喪服詣朝陽門外奉辭神主還

京文武百官素服迎於朝陽門外回宮百官行奉慰禮
一卒哭行祔廟禮一百日輟朝祭告几筵殿百官素服
黑角帶詣中右門行奉慰禮命婦詣几筵殿祭奠一凡
遇時節及忌日東宮親王祭几筵殿及詣陵拜祭一小
祥上素服烏犀帶輟朝三日是日清晨詣几筵殿行祭
奠禮東宮親王詣陵拜祭京城禁音樂三日禁屠宰三
日百官前期齋戒至日素服黑角帶詣後右門進香畢
行奉慰禮是日外命婦詣几筵殿行進香禮一東宮親

王熟布練冠九袷去首經負版辟領衰皇妃皇太子妃
王妃公主及皇孫女熟布蓋頭去腰經宗室駙馬服齊
衰三年練冠去首經一大祥奉安神主于奉先殿預期
齋戒告廟百官陪祀畢行奉慰禮各王國禁屠宰三日
停音樂三日

永樂五年文皇后喪禮

一自次日為始輟朝不鳴鐘鼓上素服御西角門文武
百官素服烏紗帽黑角帶詣思善門外哭臨畢行奉慰

禮明日如之又明日早文武官成服詣思善門外哭臨畢易素服行奉慰禮凡三日而止一文武百官自次日為始各就公署齋宿至二十七日而止一文武官四品以上命婦成服日為始喪服詣思善門內哭臨三日而止一聽選辦事等官各喪服人材監生吏典僧道坊廂耆老各素服自成服日為始赴應天府舉哀三日一内外宗室皆成服二十七日而除一天下大小衙門各遣官進香一成服後祭祀皇親駙馬共一壇公侯伯共一

壇五府同錦衣衛共一壇六部都察院同文職大小衙門共一壇文武官四品以上命婦共一壇一百日上及皇妃皇太子皇太子妃皇孫親王及妃公主以下及在京文武官并命婦各祭一壇一周年祭如百日儀百官詣西角門行奉慰禮在京禁音樂停屠宰七日一凡遇時節祭祀上位一壇皇妃東宮皇孫各王長公主公主及王妃各祭一壇

嘉靖七年孝潔皇后喪禮

一初喪三日上服素冠服一成服日為始上玄冠素服御西角門視朝十日畢易玄冠玄衣御奉天門視朝鳴鐘鼓鳴鞭如常朔望日暫免陞殿一文武百官十日內俱布冠素服經帶朝參十日之後入左掖門則烏紗帽青衣侍班奏事退出公衙及居私室仍素服白帽通前二十七日而除待梓宮發引之後服常服一在京內外禁屠七日一上於奉先等殿行禮并朝兩宮俱常服於几筵祭則服其服服滿之日命內官代祭一兩宮遣官

祭如常儀一上祭儀內贊奏就位上香奠帛奠酒上立以帛酒各授執事奠於靈前贊讀祝讀者立讀祝文畢贊舉哀上就位哭贊哀止焚祝帛禮畢

嘉靖二十七年孝烈皇后喪禮

一發喪上素服冠詣大行皇后宮舉哀設奠畢歸喪次皇妃東宮裕王景王公主皆素服畢哀設奠畢各歸喪次次日及第三日同一成服上素服詣大行皇后宮舉哀設奠大殮奉安梓宮殿几筵安神帛立銘旌上具喪

服皇妃東宮裕王景王公主等皆成服行祭禮畢歸喪
次上祭一壇皇妃共祭一壇東宮祭一壇裕王景王共
祭一壇公主共祭一壇涇簡王妃祭一壇內官內使共
祭一壇是日公侯駙馬伯五府六部等衙門官共祭一
壇文武官三品以上命婦共祭一壇一每七及百日上
及皇妃以下各祭一壇一聞喪次日為始輟朝不鳴鐘
鼓文武百官素服烏紗帽黑角帶詣思善門橋南哭臨
畢退於金水橋南伺候上素服御西角門文武百官行

奉慰禮退於本衙門宿歇不飲酒食肉次日同一成服
日為始上素冠素服十二日十二日後易淺色服視朝
俱在西角門文武百官十二日內俱布帽素服經帶朝
叅十二日之後烏紗帽黑角帶素服通前二十七日而
除上御奉天門視朝服常服百官淺色衣鳴鐘鼓鳴鞭
如常朔望日暫免陞殿待梓宮發引之日百官服常服
一成服日百官各具斬衰服詣思善門橋南朝夕哭臨
三日各十五舉聲而止每日早哭臨畢退易素服仍入

金水橋南伺候西角門行奉慰禮如前凡在衙門視事用布裏紗帽垂帶素服經帶麻鞋退居即服孝服通前二十七日而除一文武官員一品至三品命婦麻布大袖圓領長衫麻布蓋頭清晨由西華門入思善門哭臨三日而止不許戴金銀首飾仍素服二十七日而除一在京諸寺觀各聲鐘三萬杵聞喪日為始禁屠宰七日一軍民素服婦人素服不妝飾俱以聞喪日為始二十七日而除一聽選官辦事官監生吏典僧道坊廂人等

聞喪即易素服次日至第三日皆清晨赴順天府朝闕
設香案哭臨至第四日官各具斬衰服監生人等素服
朝夕哭臨三日各十五聲而止仍各素服通前二十七
日而除一各王府南京浙江等十三布政司及直隸府
分禮部請勅差官赴告一在外親郡王及世子王妃以
下聞訃皆哭盡哀行五拜三叩頭禮畢易素服第四日
服斬衰服二十七日而除一在外文武官員人等聞訃
日素服烏紗帽黑角帶於本衙門宿歇不飲酒食肉次

日具斬衰服率官僚人等於衙門朝闕設香案朝夕哭
臨三日各十五聲而止自是素服通前二十七日而除
軍民男女止素服十三日一各王府及在外文武衙門
俱免進香一成服後三日在京文職七品以上武職三
品以上衙門陸續赴思善門外進香每日鴻臚寺朝退
後由西華門引入思善門前行禮司禮監官捧進几筵
前一梓宮未發南京堂上官及朝鮮差陪臣進香服制
雖滿仍衰服行禮鴻臚寺引從西華門入陪臣衰服工

部製給一冊諡及發引以下與大喪同但八虞九虞俱於宮中遣內官行禮

永樂五年仁孝文皇后冊諡儀

前期禮部奏行祭告禮及請命頒冊寶等官是日上躬告天地於奉天殿丹陛上宮中先設冊寶案於几筵殿設香案於冊寶案前上御華蓋殿文武百官於奉天殿前丹墀內分班序立引禮引頒冊寶官至華蓋殿拜位序班舉冊寶案置殿中鴻臚寺官奏頒冊寶官行禮引

禮贊四拜畢贊跪傳制官傳制曰永樂五年十月十四日冊諡大行皇后命卿行禮引禮贊俯伏興四拜畢序班舉冊寶案出至奉天殿丹陛上以冊寶置綵輿中由中道出頒冊寶官隨至右順門外北向立內官昇綵輿由正門入至几筵殿以冊寶置於案退俟殿外尚儀女官詣香案前跪進曰皇帝遣某官某某官某冊諡大行皇后謹告奏畢興贊宣冊女官捧冊立宣於几筵之右訖置冊於案贊宣寶女官捧寶立宣於几筵之右置寶於

案尚儀女官一員復詣香案前跪奏禮畢女官以冊寶案置於几筵之左內官出報頒冊寶官禮畢頒冊寶官復命

嘉靖二十七年孝烈皇后冊諡儀

先期遣官告於太廟用牲醴祝文如常儀是日上常服御奉天門樂設而不作正副使常服百官淺色服黑角帶入班行叩頭禮畢左右侍班正副使入就拜位贊四拜禮序班舉節冊案於正中置定正副使行五拜三叩

頭禮畢序班舉案行正副使後隨鴻臚寺奏禮畢上還
百官詣思善門外侍立節冊至右順門正副使捧由正
門入至殿陛上置於案內贊奏就位上香贊宣冊太常
寺官取冊立宣訖復置於案贊禮畢贊百官行四拜禮
退正副使持節復命

隆慶元年孝潔肅皇后遷祔永陵儀孝恪皇后同
尊諡冊寶先遣官即陵園行禮訖勅命奉還官一員詣
陵供事啟攢先一日遣官以祔葬告天地宗廟社稷用

祝文祭告行禮如常儀司禮監禮部錦衣衛官提督執事者設大昇祝俯伏興亞獻終獻復贊四拜焚帛祝禮畢皇后皇子以下以次入拜行謁見四拜禮

凡皇太后皇后喪內朝賀祭祀等禮

洪武十六年正旦以高皇后喪服親王及文武衙門進到表箋先期三日捧進是日皇帝詣几筵殿祭祀畢常服御奉天殿百官常服行五拜三叩頭禮

永樂六年正旦文皇后喪服皇帝常服御殿錦衣衛設

丹陛駕教坊司陳大樂而不作百官行禮如洪武例立
春百官俱淺淡服於奉天門行禮

弘治十七年敬皇帝萬壽聖節以孝肅太皇太后山陵
襄事奏准文武百官服錦繡於奉天門行五拜三叩頭
禮是年冬至節免賀 十八年上聖祖母及聖母尊號
以太皇太后服制未滿百官并命婦俱照成化二十三
年例免賀

嘉靖二年肅皇帝萬壽聖節以孝惠皇太后服制未滿

先期免習儀至日早於奉先殿行孝慈高皇后忌辰祭
禮畢上服黃袍御奉天殿錦衣衛設鹵簿駕如常儀鳴
鐘鼓鳴鞭教坊司作樂文武百官具服朝先行四拜禮
致詞又四拜免雞唱山呼舞蹈等禮表文彩段免宣讀
陳設送內府交收 十七年章聖皇太后服既除上常
服俱墨布至喪次仍喪服百官俱青色冠服郊有事吉
服作樂廟有事淺色服不作樂 十八年正旦以章聖
皇太后未南祔上具翼善冠黃袍御奉天門鳴鐘鼓奏

堂下樂鳴鞭百官具公服行禮八月萬歲聖節以南祔
未久行禮如正旦儀九月小祥上同后妃謁几筵致祭
公侯駙馬伯文官三品以上大臣各具青服陪拜顯陵
遣勳戚大臣一員捧祀帛往祭大祥同二十年以昭
聖皇太后喪服令太享齋戒服吉正祭用樂時祫齋戒
權用青綠花樣至日樂暫設而不作二十六年以孝
烈皇后喪服題准歲暮大袷來歲孟春時享各齋戒權
用青綠花樣樂設而不作其啟蟄祈穀齋戒吉服用樂

二十七年梓宮未發題准夏至大祭地於方澤照祈穀例齋戒服吉用樂

皇妃喪禮

永樂十八年昭獻貴妃王氏喪禮

一聞喪輟朝五日一初喪上祭一壇皇后祭一壇皇妃祭一壇皇太子祭一壇親王共祭一壇公主共祭一壇一贈諡冊文行焚黃禮一七七百日周年二周年每次祭祀壇數與初喪同一開塋域遣官祀后土一行內外

衙門造辦喪儀銘旌冥器等項一發引前期辭靈祭祀
壇數與喪同惟增六尚司祭一壇內官內使祭一壇一
啟奠祖奠遣奠各遣祭一壇一發引日文武百官各素
服烏紗帽黑角帶送至路祭處所皇親駙馬共一壇公
侯伯文武衙門共一壇外命婦共一壇一過門祭祀內
門遣內官外門遣太常寺官行禮一下葬遷奠遣祭一
壇一掩壙遣官祀后土一迎靈輜至享堂行安神禮遣
祭一壇

天順七年初喪七七百日周年二周年辭靈各增祭一壇

嘉靖二十九年皇貴妃王氏喪禮

一初喪增六尚司祭一壇內官內使共祭一壇一行翰林院撰諡冊文及各祭文壙誌文一焚黃用黃絹裝褙如冊樣兩葉寫冊文是日陳設祭儀以祝文及冊文置於靈前遣司禮監官行禮獻爵讀祝訖女官宣冊禮畢焚祝及冊一靈柩前儀仗內使女樂三十二人并花旛

雪柳女隊子二十八人女將軍二十四人一靈樞至墳園奉安御前一壇遣護喪內官行禮其餘各祭俱同前一墳園內各壇路祭并靈樞頓歇處所行工部預為搭蓋席殿其輓歌執筓人等該用孝巾孝帶俱工部轉行內府該衙門製造

嘉靖二十九年未封皇妃喪禮

聞喪賜封號輟朝一日御祭一壇皇妃以下各祭一壇俱遣內官行禮光祿寺陪祭翰林院撰冊文祝文壙

誌文擇日行焚黃禮 七七百日周年二周年每次御
祭一壇皇妃共祭一壇 開塋域祀后土及辭靈祭祀
壇數與初喪同俱遣內官行禮祭引以後合行事宜同
前 凡未封妃喪葬禮儀隆殺不等俱禮部開座題請
施行

皇太子喪禮

洪武二十五年懿文太子喪禮

皇帝以日易月服齊衰十二日祭畢釋之在內文武百

官即日於公署齋宿翼日素服入臨文華殿給散麻服
越三日成服詣春和門會哭明日素服行奉慰禮其當
祭祀及送葬者仍衰經以行在京停大小祀事及樂至
復土日而止停嫁娶六十日在外文武百官聞喪易服
於公署發哀次日成服行禮停大小祀事及樂十三日
停嫁娶三十日

嘉靖二十八年莊敬太子喪禮

一聞喪第四日成服皇上遣祭一壇母妃祭一壇裕王

景王共祭一壇公主共祭一壇內官內使共祭一壇東
宮六局官共祭一壇一文武百官自聞喪次日為始具
素服烏紗帽黑角帶於本衙門宿歇至第四日早具齊
哀服不杖赴南城明德宮候大殮畢舉哀行四拜禮仍
共舉祭一壇一每七百日皇上遣祭一壇母妃祭一壇
裕王景王共祭一壇一自聞喪次日為始輟朝不鳴鐘
鼓十日止一聞喪第五日百官具素服烏紗帽黑角帶
詣西角門行奉慰禮退易布裹紗帽經帶麻履於各衙

門辦事通前成服日為始十二日而除在京軍民人等各素服十二日禁屠宰五日聽選辦事官吏監生僧道耆老人等俱於成服日赴順天府舉哀行四拜禮官具哀服監生人等具素服一翰林院撰祭文光祿寺辦祭物一各王府直隸各布政司等處禮部請勅差官訃告一諸王及世子王妃郡主以下聞訃次日具素冠服舉哀行四拜禮畢服十二日而除一在外文武官員人等聞訃次日各具哀服舉哀行四拜禮畢易素冠服經帶

麻履十二日而除其各王府及天下文武衙門俱免進香一諡冊先期題請欽定大臣二員充正副使行翰林院擬請諡號撰諡冊文諡寶文壙誌文祭告文并各該衙門造辦諡冊諡寶壙誌欽天監擇吉先期一日遣大臣告於太廟寢內侍官設節冊寶案於皇太子靈柩前至日早鴻臚寺設節冊寶案於奉天門稍東百官青衣黑角帶侍班正副使各就拜位候序班舉節冊案至丹墀中道置定鳴贊贊行五拜三叩頭禮畢序班舉案正

副使後隨繇左順中門至明德宮內侍預設玄饌於皇
太子靈樞前正副使捧節冊寶置於案就位上香贊宣
冊寶太常寺堂上官立宣訖復置於案贊禮畢正副使
捧節復命次日勅諭禮部以賜諡頒示天下照例差官
齋捧一安葬先期擇地擇日遣工部堂上官祭告啟土
一發引先期命大臣一員護喪一員題主各衙門堂上
官題請各一員照例率領所屬送喪欽天監差官二員
前去候時工部搭蓋各處席殿前一日起禁屠宰三日

遣官一員以葬期告於太廟寢內命婦告於孝烈皇后
几筵及遣官祭告經過各門橋司禮監錦衣衛官提督
執事者設靈輿謚冊寶輿并真亭儀仗於明德宮門外
設方相冥器於北安門外以俟是晚皇上遣祭一壇母
妃祭一壇皇妃共祭一壇裕王景王共祭一壇公主共
祭一壇俱遣內官行禮至日文武百官布裏紗帽素服
經帶麻履候於北安門外步送至西直門外祭畢即回
其分送入山官員俱免辭朝步送至西直門騎送至墳

所還日朝見

護喪官并各執事冠服同

啟奠遣奠靈輿至墳所皇上

皆遣祭一壇

護喪官行禮

路祭文武官等衙門共祭一壇皇

親駙馬共祭一壇

俱西直門外廣殿行禮

祭畢而回其護喪官并

墳所執事官待葬畢回凡回還官員俱易烏紗帽青衣

黑角帶次日以後常服辦事一下葬皇上遣祭一壇母

妃以下祭同前俱內侍官於將葬時行禮葬畢行贈禮

如儀掩壙後皇上遣祭一壇俱護喪官行禮掩壙畢題

主官題主護喪官獻酒贊讀祝禮畢安神皇上遣祭一

壇葬畢祀后土遣工部堂上官行禮一百日期年每次
皇上遣祭一壇母妃以下祭同前

隆慶元年加諡憲懷太子靖悼王儀

蓬萊太和二
公主追封同

前期一日鴻臚寺官設節案內侍官設冊輿二并香亭
於皇極門東是日早遣官以冊諡告奉先殿上具素翼
善冠麻布袍腰經親告世宗肅皇帝几筵各用祝文祭
品如常儀至期上仍具前冠服御皇極門百官俱照常
烏紗帽素服黑角帶入班行叩頭禮畢左右侍班遣官

就拜位序班舉節案置於中贊五拜三叩頭禮畢序班

舉節內侍官舉冊輿香亭俱繇左階降

公主冊
繇右

鴻臚寺

奏禮畢上還錦衣衛官校接節冊輿香亭繇午門等左

門出

公主冊
繇右

遣官隨行至墳園行禮太常寺先於墳園

陳設祭品如常儀鴻臚寺設節案於享殿內正中冊案

二於左右設香案於節案前內侍官設主案二于殿東

制淨水刷子粉盞筆硯盥盆悅中等物候節冊輿至墳

園繇中門進至享殿前捧節冊官捧繇殿中門入各置

於案導引官引遣官至香案前上香贊宣冊宣冊官取
憲懷太子冊立宣訖仍置於案贊宣冊宣冊官取靖悼
王冊立宣訖仍置於案執事官隨舉主案於香亭前稍
東西向題主官進至主案前東立西向內侍官二員分
詣神牀前跪啟謹請憲懷太子神主敬用奉題謹請靖
悼王神主敬用奉題內侍官各盥手捧主案於案上洗
磨舊字別塗以粉中書官重寫題主官盥手各奉題訖
內侍官奉主各安於神座跪啟謹請憲懷太子神靈上

神主謹請靖悼王神靈上神主內贊贊遣官奠獻讀祝
行禮如常儀禮畢內侍官啟匱覆主奉安於神座訖次
日遣官捧節復命

親王喪禮

喪聞上輟朝三日禮部奏差官掌行喪祭禮翰林院撰
祭文諭冊文擴誌文工部造銘旌差官造墳又欽天監
取官一員前去卜葬國子監取監生八名報訃各王府
御祭一壇

牲用牛犢羊豕
餘祭止用羊豕

太皇太后皇太后東宮各一

壇在京文武衙門各一壇七七下葬百日周年二周年
除服御祭各一壇下葬以前凡御祭及東宮文武衙門
二祭總差侯伯一員行禮周年以後三御祭各差行人
一員行禮太皇太后皇太后二祭遣本府內官行禮其
祭物本布政司轉屬買辦冥器喪儀本處各該衙門成
造其初喪本國內禁屠宰三日禁音樂嫁娶至葬畢乃
止其封內文武衙門各祭一壇非封內者不吊祭發引
在城軍民會送其大小殮七七百日遷柩祖奠發引下

葬題主虞禮本府俱自有祭祀其服制王妃世子衆子及郡王郡主下至宮人俱衰服三年封內文武官員齊衰三日哭臨五日而除在城軍民俱素服五日郡王衆子郡主為兄及伯叔父服齊衰期年郡王妃服小功五月凡親王因事革爵後復原爵者例遣官祭仍給葬凡世子喪禮聞喪御祭一壇東宮祭一壇七七百日下葬周年二周年除服御祭各一壇俱遣本布政司官行禮翰林院撰祭文謚冊壙誌文工部造銘旌國子監

取監生報訃各王府本布政司委官造墳安葬

世子墳
價隆慶

三年議革轉屬買辦祭物冥器喪儀等本處各該衙門成造

凡世孫喪禮聞喪御祭一壇東宮祭一壇下葬百日

周年除服御祭各一壇翰林院撰祭文布政司造墳安

葬

今革

轉屬買辦祭物

親王妃喪禮

郡王妃世子
世孫妃附

聞喪御祭一壇太皇太后皇太后中宮東宮公主各祭

一壇俱遣本府內官行禮翰林院撰祭文壙誌文工部

造銘旌行布政司委官開壙合葬

今准差欽
天監官

及轉屬買

辦祭祀品物

祭用
羊豕

國子監取監生報訃各王府其冥器

喪儀本處該衙門成造繼妃次妃祭禮同其夫人則御

祭一壇俱造壙祔葬

今次妃止一
祭夫人俱革

凡親王革爵其妃

未奪封號者准給祭葬郡王妃喪禮與親王妃同惟聞

喪無公主祭一壇郡王繼妃次妃喪禮與正妃同親郡

王生母追封次妃未葬者與祭一壇造壙祔葬嘉靖四

十四年議萬曆九年更議親郡王生母封次妃者各與

祭一壇葬革 凡世子妃世孫妃喪禮俱與郡王妃同

公主喪禮

喪聞上輟朝一日御祭一壇皇太后中宮東宮各祭一壇各公主共祭一壇翰林院撰祭文壙誌文戶部給齋糧一百石工部造銘旌神主魂帛棺槨墳壙誌石冥器儀仗順天府買辦麻布一百疋及真亭綵桌長明燈油等物欽天監差官選地擇日國子監取監生報訃各王府孝服花冠等件內府內官監等衙門成造其七七百

日周年二周年除服御祭各一壇下葬輟朝一日上位
皇太后中宮東宮公主各祭一壇皇親命婦共一壇公
侯伯都督命婦共一壇六部等衙門四品以上官命婦
共一壇都指揮指揮命婦共一壇其啟土遷柩祖奠過
門過橋掩壙題主奉安神主虞祭各祭物俱光祿寺備
辦

嘉靖二十三年未封公主喪禮

喪聞賜封御祭一壇皇妃共祭一壇裕王景王共祭一

壇公主共祭一壇涇簡王妃祭一壇俱用素饌遣內官
行禮欽天監差官擇地并選出殯等項日期工部差屬
官一員造墳享堂等項破土祀后土遣大臣行禮發引
御祭一壇皇妃以下祭同前俱用素饌遣內官行禮靈
樞繇東上南門東上北門北中門北安門出各祭一壇
內官行禮西直門祭一壇太常寺官行禮工部內監官
於墳所安設享堂各用儀物俱行內府該衙門預行製
造錦衣衛撥旗校擺路教坊司撥女樂三撥并樂人三

百員名送至墳所靈柩至墳及下葬各御祭一壇用素
饌遣內官行禮掩土後祀后土并題神主安神各祭俱
遣大臣行禮百日周年二周年每次御祭一壇皇妃以
下祭數同前俱用素饌遣內官行禮聞喪下葬俱免輟
朝

郡王喪禮

長子附

喪聞上輟朝一日翰林院撰祭文謚冊壙誌文工部造
銘旌行人司差官掌喪禮本處陰陽生一名卜葬國子

監取監生報訃各王府御祭一壇東宮一壇在京文武
衙門各一壇七七百日下葬周年二周年除服御祭各
一壇下葬以前諸祭總遣行人一員行禮周年以後遣
布政司官行禮本布政司委官造墳安葬今減半轉屬
買辦祭物祭用羊豕冥器喪儀等本處各該衙門成造郡王
及妃已經奏准襲封未及冊封而故者給祭葬與已冊
封同但免輟朝報訃并差官行禮其革爵後復原爵者
與妃未奪封號者亦如之革管府事者與祿米革三分

之一者比郡王例減半其革爵戴平頭巾閒住者止與祭一壇撥地安葬 凡長子喪禮聞喪御祭一壇下葬

百日周年除服御祭各一壇

自長子至中尉諸祭俱遣本府長史等官行禮翰

林院撰祭文本布政司造墳安葬今革轉屬買辦祭祀品

物長子夫人已經奏准封妃未及冊封而故者例與妃

同 凡郡王嫡長孫故與祭三壇嫡曾長孫故與祭一

壇 凡郡主喪禮與郡王妃同惟無壙誌文 凡鎮國

將軍喪禮與世孫同 凡輔國將軍喪禮無周年除服

二祭餘與鎮國將軍同鎮國將軍革爵復冠帶者給祭如輔國將軍例 凡奉國將軍喪禮無下葬百日周年

除服四祭餘與輔國將軍同 凡鎮國輔國奉國中尉

御祭各一壇鎮輔二中尉有司造墳安葬奉國中尉有

司量與造墳

造墳今並革

凡鎮國將軍夫人至中尉安人

俱御祭一壇造壙合葬

葬畢

凡將軍生母追封夫人者

與祭一壇

今革

凡縣主郡君縣君喪禮御祭中宮祭俱

一壇造墳安葬葬革

凡鄉君喪禮止御祭一壇自王

妃至鄉君諸祭俱遣本府內官行禮 凡儀賓卹典嘉

靖四十四年議定係親郡王府者照例賜祭不給葬價
係將軍以下者祭葬俱革 萬厯七年更定親郡王儀

賓祭葬一體并革 凡郡王將軍中尉郡縣主君墳價

嘉靖四十四年議定俱免給 萬厯七年更定郡王墳

價量給一半若係帝孫者照舊全給其將軍以下並免

凡親郡王將軍等葬俱世長子一人送至墳所當日

即回 凡王葬妃及將軍等葬其妻得親至墳所看視

一次當日即回 凡將軍病故無嗣者其葬許第一人
送至墳所當日即回 凡妃夫人病故無嗣者其葬許
侄一人送至墳所當日即回 凡親郡王將軍受封之
後止許出城祭掃一次當日即回 凡宗室庶人并母
妻喪所在官司會同該府教授等官於本處空間相應
地面造墳安葬今革 凡宗室為事送發高牆病故安葬
在彼其女及婿願留供祀者鳳陽府月給衣糧三石
凡王府奏討墳戶嘉靖三年准撥附近民人三名看守

萬曆九年議准親王每墳撥給軍校五名郡王不許
一槩濫給 凡親王致祭舊例遣侯伯給勅行嘉靖四
十四年議罷止差卿等五品以上官或禮部司官前去
照行人差至郡王府給精微批不必請勅 萬曆三年
議准各王府奉差官不許擅為題請寬限違者罪其輔
導官

禮部志稿卷三十二

欽定四庫全書

史部
禮部志稿卷三十三
四

詳校官監察御史臣龔驤文

編修臣程嘉謨覆勘

總校官知縣臣楊懋珩

校對官中書臣吳俊

謄錄監生臣楊兆豐

欽定四庫全書

禮部志稿卷三十三

明 俞汝楫 編

祠祭司職掌

品官喪禮

初終

有疾遷於正寢養者皆齋徹樂飲藥疾困去故衣加新衣清掃內外分禱所祀侍者坐持手足遺言則書之屬

續以俟絕氣男子不絕於婦人之手婦人不絕於男子

之手乃廢牀寢於地孝子啼餘皆哭男子白布衣被髮

徒跣婦人青縑衣被髮不徒跣女子子亦然

父為長子為人後者

為其本生父母皆不徒跣女子嫁者髻

齊衰以下丈夫素冠婦人去首飾

孝子坐於牀東餘在其後啼踊無算兄弟之子以下又

在其後俱西面南上妻坐於牀西妾及女子子在其後

哭踊無算兄弟之女以下又在其後俱東面南上藉藁

坐哭內外之際隔以行帷祖父以下於帷東北壁下南

面西上祖母以下於帷西北壁下南面東上外姻丈夫
於戶外之東北面西上婦人於主婦西南北面東上皆
舒席坐哭若舍窄則宗親丈夫在戶外之東北面西上
外姻丈夫在戶外之西北面東上若內喪則尊行丈夫
外親丈夫席位於前堂在戶外之左右俱南面宗親戶
東西上外親戶西東上乃復於正寢復者以死之上服
左荷之升自前東榮當屋履棟北面西上左執領右執
腰招以左每招曰某人復三呼而止

男子稱字及伯
仲婦女稱姓

以

衣投於前承之以篋升自東階入以覆尸復者降自後

西榮乃立喪主

謂長子無則長孫

主婦

亡者之妻無則主喪者之妻

護喪

子孫

知禮能幹者為之

司書司貨

子弟或使僕為之

執事者設牀於室戶內

之西去脚舒簟設枕施幄遷尸於牀南首覆用殮衾去

死衣即牀而奠奠者以酒饌升自東階設於尸東當隅

內喪皆內贊者行事受於戶外入而設之

既奠贊者降出帷堂掌事者掘坎

於屏處盆盤之屬陳于西階下沐巾浴巾浴衣皆具於

西序南上陳襲衣于房中掌事者為湯以俟以浴盆及

沐盤升自西階以授沐者

以待者四人為之六品以下二人

沐者入喪

主以下皆出戶外北面西上俱立哭乃沐櫛束髮用組抗衾而浴拭以巾餘水棄於坎設牀于尸東衽下莞上簟浴者舉尸易牀設枕剪鬚斷爪盛於小囊大殮納於棺著明衣裳以方巾覆面仍以大殮之衾覆之喪主以下入就位哭乃含贊者奉盤水及筭升堂含者

六品以下喪主

自為之

盥手於戶外贊者沃盥含者洗飯玉實於筭執以

入贊者從入北面徹枕奠筭於尸東含者坐于牀東西

面發巾實飯含於尸口訖喪者復位襲者以牀升入設
于尸東布枕席如初執服者陳襲衣於席遷尸於席上
而衣之去巾加面衣設充耳著握手納履若舄覆以大
殮之衾內外皆就位哭乃置靈座結白絹為魂帛立銘
旌倚於靈座之右諸子三日不食期九月之喪三不食
五月三月之喪再不食

小殮

小殮之禮以喪之明日厥明陳其殮衣於東序

四品五
品以下

于東房

饌于堂東階下設牀施薦席褥於西階鋪絞衾衣
舉之升自西階置於尸南先布絞之橫者三於下以備
周身相結乃布縱者一於上以備掩首及足也侍者盥
手舉尸男女共扶助之遷于牀上先去枕而舒絹疊衣
以藉其首仍卷兩端以備兩肩空處又卷衣夾其兩脛
取其正方然後以餘衣掩尸左衽不組裹之以衾而未
結以絞未掩其面蓋孝子猶欲俟其復生欲時見其面
也殮畢覆以衾喪主西向憑尸哭擗主婦東向憑尸哭

踊斬衰者袒以麻繩括髮齊衰以下裂布廣寸自項向前交于額上卻繞髻如著掠頭婦人以麻撮髻而髻殮者舉尸男女從奉之遷于堂中哭位如室內執事者盥手舉饌升自東階至靈座前祝焚香洗盞斟酒奠之喪主以下哭盡哀乃代哭不絕聲宵為燎於庭厥明滅燎乃大殮

大殮

大殮之禮以小殮之明日夙興陳衣于東序饌于堂東

階下如小殮之儀舉棺以入置于堂中少西侍者先置
衾于棺中垂其裔於四外侍者與子孫婦女俱盥手掩
首結絞共舉尸納於棺中實生時所落髮齒及所剪爪
於棺角又揣其空缺處卷衣塞之務令充實不可搖動
以衾先掩足次掩首次掩左次掩右令棺中平滿喪主
主婦憑哭盡哀乃召匠加蓋下釘徹牀覆柩以衣設靈
牀于柩東贊者以饌升入室西向奠於席前內外皆就
位哭如初喪主以下各歸喪次

成服

大殮之明日厥明五服之人各服其服然後朝哭相弔
諸子孫就祖父及諸父前跪哭皆盡哀就祖母及諸母
前哭亦如之女子子就祖母及諸母前哭遂就祖父及
諸父前哭如男子之儀主婦以下就伯叔母哭亦如之
訖乃復位諸尊者降出還次喪主以下降立于東階下
外姻在南俱西面北上哭盡哀各還次既成服喪主及
兄弟始食粥妻妾及期九月者蔬食水飲不食菜果大

功以下異門者各歸其家自是每日晨起喪主以下皆服其服入就位尊者坐哭卑者立哭

朝夕奠

每日晨起侍者設盥櫛之具於靈牀側奉魂帛出就靈座然後朝奠執事者設饌祝盥手焚香斟酒喪主以下再拜哭盡哀食時上食至夕進夕奠如朝奠儀喪主以下奉魂帛入就靈牀哭盡哀朝夕之間哀至則哭自此以至於虞朝夕如之若遇朔望則具殷奠比之常奠其

饌為盛禮如朝奠行之至夕徹去進夕奠如常禮有時物則薦之百日而卒哭

弔奠賻

始死訃告于親戚僚友弔者至執友親厚之人則入哭臨尸盡哀出拜靈座上香再拜遂弔喪主相持哭盡哀喪主以下哭對無辭凡弔者奠賻皆有狀先具刺通名喪主炷香燃燭布席皆哭以俟護喪者出迎賓賓入至廳事進揖曰竊聞某人傾背不勝驚怛敢請入酹并申

慰禮護喪者引賓入至靈座前哭盡哀再拜焚香跪酌
祭酒俯伏興護喪止哭者祝跪讀祭文奠賻狀於賓之
右畢興賓主皆哭盡哀賓再拜喪主哭出西向稽顙再
拜賓亦哭東向答拜進曰不意凶變某親某官奄忽傾
背伏惟哀慕何以堪處喪主對曰某罪逆深重禍延某
親伏蒙奠酌并賜臨慰不勝哀感又再拜賓答拜又相
向哭盡哀賓寬譬喪主曰脩短有數痛毒奈何願慰孝
思俯從禮制乃揖而出喪主哭而入護喪者送至廳事

茶湯而退喪主以下止哭

亡者官尊即云薨逝稍尊即云捐館生者官尊則云奄棄

養榮

擇地祭后土

三月而葬前期擇地之可葬者蓋地有美惡地之美者則其神靈必安其子孫必盛地之惡者則反是所謂美者土色之光潤草木之茂盛他日不為道路不為城郭不為溝池不為貴勢所奪不為耕犁所及即所謂美地也古人所為卜其宅兆者正此意而非若後世陰陽家

禍福之說也既得地喪主帥執事者於所得地掘兆四隅外其壤掘中南其壤各立一標當南門立兩標擇遠親或賓客一人告后土氏祝帥執事者設位於中標之左南向設盞陳饌於其前又設盥盆帨巾二於其東南其東有臺架告者所盥其西無者執事者所盥也告者吉服入立於神位之前北面執事者在其後東上皆再拜告者與執事者皆盥悅執事者一人取酒注西向跪一人取盞東向跪告者斟酒反注取盞酌于神位前俯

伏興少退立祝執版立於告者之左東向跪讀之曰維
某年歲月朔日辰某官姓名敢告于后土氏之神今為
某官姓名營建宅兆神其保佑俾無後艱謹以清酌脯
醢祇薦于神尚享訖復位告者再拜祝及執事者皆再
拜徹出遂穿壙乃刻誌石造冥器備大輿作神主以俟
發引

發引

啟之日掌事者納柩車於大門之內當門南向進靈車

於柩車之右先於墓所張吉凶帷凶帷西吉帷東俱南向設靈座于吉帷下如常儀啟之夕發引前五刻擊鼓為節陳布吉凶儀仗方相誌石及冥器等物於柩車前紼披鐸翬挽歌者皆具二刻再擊鼓為節內外俱興立哭於位執紼者皆入掌事者徹帷持翬者俱升以翬障柩執紼者乃升執鐸者入夾西階立執燹者入當西階南北面立執旌者立於執燹者南北向陳布訖三擊鼓為節乃引靈車於內門外南向祝詣靈座前西向跪昭

告曰孤子某

母則云
哀子

謹用吉辰奉歸幽宅靈車就引神

道紆迴惟以荒蓼無任哽絕興立少頃執鐸者俱振鐸

引柩詣階間南向持筭者常以筭障柩柩降階執燹者

却行而引止則迴北向立執旌者繼燹而行止則北向

立

無燹者則
執旌者引

喪主以下以次從柩哭而降主婦以下又

次之柩至庭喪主及諸子以下於柩東西向南上祖父

以下於東北南面西上異姓丈夫於喪主東南西面北

上妻妾女子子以下於柩西東面南上祖母以下於西

北南面東上異姓婦人於主婦西南東面北上皆立哭
內外之際障以行帷祝帥執饌者設祖奠於柩東祝以
酒奠訖詣饌南北面跪曰永遷之禮靈辰不留謹奉旋
車式遵祖道尚享少頃徹之柩動旌次之纛次之喪主
以下從哭於柩後婦人次之遂升柩就輿內外哭位如
初在庭之儀乃設遣奠於柩車前如祖奠之儀祝奠酒
訖少頃徹饌祝奉魂帛置靈車上別以箱盛主置帛後
靈車動從者如常靈車後方相車次誌石車次冥器輿

次下帳輿次米輿次酒脯輿次食輿次銘旌次熏次鐸
次挽歌次柩車喪主及諸子俱經杖衰服徒跣哭從餘
各依服精粗為序哭從出門內外尊行者皆乘車馬哭
不絕聲出郭門親賓送者權停柩車乘者皆下哭贊者
引親賓以次俱向柩立哭盡哀卑者再拜而退婦人亦
如之親賓既還乘車馬如初若墓遠及病不堪步者出
郭喪主及諸子亦乘去塋三百步乃下靈車至帷門外
迴南向遂薦食於靈座前少頃徹之柩車至入凶帷南

向祝設几席於柩車之東初至宿次內外皆就柩車所
分東西如常立哭遂設酒脯之奠柩車至壙前迴南向
哭位如在庭之儀掌事者陳冥器於壙東南西向北上
乃下柩於席丈夫柩東婦人柩西以次憑哭盡哀各退
復位內外卑者哭再拜辭訣贊者引喪主以下哭於羨
道東西面北上妻及女子子以下哭於羨道西東面北
上哭踊無算婦人皆障以行帷掌事者設席於壙內遂
下柩於壙內席上北首覆以夷衾持翼者入倚翼於壙

內兩廂遂以下帳張於柩東南向米酒脯陳於帳東北
食器設於帳前醯醢設於食器南藉於版冥器設於壙內
之左右掌事者以玄纁授喪主喪主授祝祝奉以置柩
旁喪主拜稽顙施銘旌誌石於壙內乃掩壙復土喪主
以下稽顙哭盡哀乃祠后土於墓左

如卜宅儀祝云某
官封諡寔茲幽宅

神其保佑
俾無後艱

取木主而題之執事者設桌子於靈座東南

西向置筆硯墨對桌置盥盆悅巾喪主立於其前北向
祝盥手出主卧置桌子上使善書者盥手西向立先題

陷中後題粉面題畢祝奉置靈座而藏魂帛於箱中炷香斟酒執版出於喪主之右讀云孤子某敢昭告於先考某官封謚府君形歸窀穸神返室堂神主既成伏惟尊靈舍舊從新是憑是依畢喪主再拜哭盡哀止祝奉神主置靈車上執事者徹靈座遂行內外從哭如來儀反哭

出墓門尊者乘車馬去墓百步許卑者乃乘靈車至宅內外乘者皆下靈車入至西階前迴南向少頃靈車退

祝奉神主置於靈座喪主以下升立哭於靈座東西向
南上內外以次升祖父以下哭於帷東南面西上妻及
女子子以下哭於靈西東面南上祖母以下哭於帷西
南面東上外姻丈夫惟東北面西上婦人惟西北面東
上親賓弔如初哭盡哀相者引喪主以下降各還次沐
浴以俟虞

虞

柩既入壙掌事者先歸脩虞事或墓遠則但不出是日

可也喪主以下既沐浴執事者陳器具饌設盥盆帨巾
各二於西階西南上酒瓶并架一於靈座東南置桌子
於其東設注子及盤盞於其上火爐湯瓶於靈座西南
置桌子於其西設祝版於其上設蔬果盤盞於靈座前
桌上匕筯居內當中酒盞在其西醋標居其東果居外
蔬居果內實酒於瓶設香案於堂中炷火於香爐東茅
聚沙於香案前具饌如朝奠陳於堂門之東祝出神主
於座喪主及兄弟倚杖於室外及與祭者皆入哭於靈

座前其向皆北面以服為列重者居前輕者居後尊長坐卑幼立丈夫處東西上婦人處西東上逐行各以長幼為序侍者在後乃降神祝止哭者喪主降自西階盥手悅手詣靈座前焚香再拜執事者皆盥悅一人開酒實於注西面跪以注授喪主喪主跪受一人捧桌上盤盞東面跪於喪主之左喪主斟酒於盞以注授執事者左手取盤右手執盞酌於茅上以盤盞授執事者俯伏興少退再拜復位既降神祝進饌執事者佐之喪主尸

初獻進詣注子桌前執注北面立執事者一人取靈座
前盤盞立於喪主之左喪主斟酒反注於桌上與執事
者俱詣靈座前北面立喪主跪執事者亦跪進盤盞三
祭於茅束上俯伏興執事者授盞奉詣靈座前奠於故
處祝執版出於喪主之右西面跪讀之云日月不居奄
及初虞夙興夜處哀慕不寧謹以潔牲庶羞粢盛醴齊
哀薦禘事祝興喪主哭再拜復位哭止主婦為亞獻禮
如初不讀祝親賓一人為終獻禮如亞獻乃脩食執事者

執注添盞中酒喪主以下皆出祝闔門喪主立於門東
西向卑幼丈夫在其後重行北上主婦立於門西東向
卑幼婦女亦如之尊長休於他所如食間祝進當門北
面噫歆告啟門三乃啟門喪主以下入就位祝立於喪
主之右斂主匣之置故處喪主以下哭辭神再拜盡哀
止出就次執事者徹饌祝取魂帛埋之屏處潔地罷朝
夕奠遇柔日再虞乙丁巳禮如初虞惟前期一日陳設
辛癸具饌具饌厥明風興設
蔬果酒醴質明行事祝出神主於座遇剛日三虞甲丙
祝辭改初虞為再虞祫事為虞事戊庚

壬禮如再虞

祝辭改再虞為三虞虞事為成事若去家經宿以上則初虞於所館行之墓遠塗中

過柔日亦於所館行之若三虞必須至家始可行禮

三虞

三虞後遇剛日卒哭前期一日陳器具饌

並同虞祭惟更設玄酒瓶

一於酒瓶之西

厥明夙興設蔬果酒饌

並同虞祭

質明祝出主喪主

以下皆入哭降神喪主捧魚肉主婦盥悅奉麴米食喪

主奉羹主婦奉飯以進乃初獻

並同虞祭惟祝執版出於喪主之左東向跪讀

為異祝辭改三虞為卒哭哀薦成事下云來日躋祔於祖考某官府君尚享

亞獻終獻侑食

闔門啟門辭神其儀並與虞祭同自是朝夕之間哀至不哭其朝夕哭猶故喪主兄弟蔬食水飲不食菜果寢席枕木

祔

卒哭明日而祔卒哭之祭既徹即陳器具饌陳於祠堂堂狹即於廳事隨便設亡者祖考妣位於中南向西上設亡者位於其東南西向母喪則不設祖考位置酒瓶玄酒瓶於阼階上火爐湯瓶於西階上具饌如卒哭而

三分母喪則兩分祖妣二人以上則以親者厥明設蔬
果酒饌質明喪主兄弟皆倚杖於階下入詣靈座前哭
盡哀止乃詣祠堂祝軸簾啟櫝奉所祔祖考之主置於
座內執事者奉祖妣之主置於座西上喪主以下還詣
靈座所哭祝奉主櫝詣祠堂西階上桌子上喪主以下
哭從如從柩之次至門止哭祝啟櫝出主乃叅神在位
者皆再拜乃降神祝進饌酌獻先詣祖考妣前祝版云
孝孫某謹以潔牲庶羞粢盛醴齊適於某考某官府君

隋祔孫某官尚享

皆不哭

內喪則云某妣某封某氏隋祔

孫婦某封某氏次詣亡者位前祝版云薦祔事於先考某官府君適於某考某官府君尚享三獻侑食闔門啟門辭神並同卒哭儀禮畢祝奉主各還故處先納祖考妣神主於龕中匝之次納亡者神主西階桌子上匝之奉而反於靈座出門喪主以下哭從如來儀

小祥

期而小祥喪至此凡十三月

不計閏

古者卜日而祭今止

用初忌以從簡易前期一日喪主以下皆沐浴喪主帥衆丈夫灑掃滌濯主婦帥衆婦女滌釜鼎具祭饌

如卒哭

設次陳練服厥明夙興設蔬果酒饌質明祝出主喪主倚杖於門外與期親各服其服而入皆哭盡哀止乃出就次易服復入哭祝止哭乃降神初獻亞獻終獻侑食闔門啟門辭神並同卒哭之儀祝版云日月不居奄及小祥夙興夜處小心畏忌不惰其身哀慕不寧敢用潔牲庶羞粢盛醴齊薦此常事尚享自是止朝夕哭始食

菜果

大祥

再期而大祥喪至此凡二十五日亦止用第二忌日祭

前期一日沐浴陳器具饌

如小祥

設次陳禪服以酒果告

遷於祠堂告畢改題神主如加贈之儀遞遷而西虛東

一龕以候新者厥明行事皆如小祥之儀

祝服改小祥曰大祥常事

曰祥事

祝畢奉神主入於祠堂喪主以下哭從如祔之敝

至祠堂前止哭執事者徹靈座斷杖棄之屏處奉遷主

埋於墓側始飲酒食肉而復寢

禫

大祥之後間一月而禫禫者淡淡然平安之意蓋喪至此計二十有七月前一月下旬卜來月三旬中各一日或丁或亥設桌子於祠堂門外置香爐香盒烝玆於其上喪主禫服西向衆兄弟次之子孫在其後重行北上執事者北向東上喪主炷香燭玆命以上旬之日曰某將以來月某日祇薦禫事於先考某官府君即以玆擲

於盤以一俯一仰為吉不吉更命中旬之日又不吉則直用下旬之日喪主乃入祠堂本龕前再拜在位者皆再拜喪主焚香祝執版立於喪主之左跪告曰孝子某將以來月某日祇薦禋事於先考某官府君卜既得吉敢告喪主再拜降與在外者皆再拜祝闔門退乃前期一日沐浴設神位於靈座故處陳器具饌厥明行事皆如大祥之儀喪主以下詣祠堂祝奉主櫝置於西階桌上出主置於座喪主以下皆哭盡哀乃降神三獻侑

食闔門啟門禮畢辭神乃哭盡哀送神主至祠堂

聞喪奔喪

始聞親死以哭答使者盡哀問故又哭盡哀乃易服遂日行百里不以夜行見星而行見星而舍道中哀至則哭哭避市朝望其州境縣境其城其家皆哭至於家內外哭待於堂上入門而左升自西階殯東西面憑殯哭盡哀少退再拜退於東序被髮復殯東西面坐哭又盡哀尊卑撫哭如常訖內外各還次厥明坐哭於殯東如

初四日成服與家人相弔賓至拜之如初若未得行則設位四日而變服在道至家皆如上儀若既葬則先之墓望墓哭至墓哭拜歸詣靈座前哭拜四日成服如儀齊衰以下聞喪為位而哭若奔喪則至家成服若不奔喪則四日成服凡奔喪齊衰望鄉而哭大功望門而哭小功至門而哭總麻即位而哭不奔喪者齊衰三日中朝夕為位會哭四日之朝成服亦如之大功以下始聞喪為位會哭四日成服亦如之皆每月朔為位會哭月

數既滿次月之朔乃為位會哭而除之其間哀至則哭可也

改葬

凡有改葬者皆具事因聞於官勘驗得實始聽之將改墓先於墓所隨地之宜張白布帷幕開戶向南其日內外諸親皆至墓所各就便次孝子以下及妻妾女子子俱總麻服周親之下素服丈夫於墓東西向婦人於墓西東向皆北上婦人障以行帷俱立哭盡哀卑者再拜

祝立於羨道南北向內外哭止祝三聲噫嘻啟以改葬
之故內外又哭盡哀權就別所掌事者開墳訖內外又
就位哭如初掌事者設席於墓下舉棺出置於席上內
外俱從哭於墓所分東西位如常儀祝以功布拭棺掌
饌者設饌於柩南孝子盥手以盞跪奠酒再拜訖少頃
徹奠進柩車於帷門外南向升柩於車遂詣幕所內外
俱哭掌事者先設牀於幕下有枕席周設帷柩車至帷
門外丈夫柩東婦人柩西俱立哭掌事者舉柩入設牀

柩東舉尸出置於牀南首遂殮如大殮之儀

如不易棺則不設牀

乃設靈座於吉帷內幕下西廂東向乃葬將引柩告曰
以今吉辰即用宅兆不設祖奠無反哭無方相魁頭餘
如常葬之儀既葬就吉帷靈座前一虞虞如常儀其祝
辭云維年月朔日辰孝子某敢告於考某官改茲幽宅
禮畢終虞夙夜匪寧啼號罔極謹以清酌庶羞祇薦虞
事尚享孝子以下出就別所釋總麻素服而還掌饌者
徹饌掌事者徹靈座

喪儀

洪武五年定

棺用油杉朱漆

槨用土杉

牆窆公侯六三品以上

四五品以上二

冥器公侯九十事一品二品八十事

三品四品七十事五品五十事六品七品三十事八品

九品二十事

引披鐸公侯四引六披左右各八鐸一

品二品二引四披左右各六鐸三品四品二引二披左

右各一鐸

羽旛竿長九尺五品以上一人執之以引

樞六品以下不用

功布品官用之長三尺

方相四

品以上四目七品以上四目八品以下不用 柳車上用竹格以綵結之旁施帷幔四角垂流蘇 誌石二片品官皆用之其一為蓋書某官之墓其一為底書姓名鄉里三代生年月日及子孫卒葬月日婦人則隨夫及子孫封贈二石相向用鐵束埋墓中 祭物四品以上用羊豕九品以上用豕

庶人喪禮

初終

疾病遷居正寢清掃內外分禱所祀使人坐持手足遺言則書之屬續以俟絕氣氣絕乃哭廢牀寢於地乃易服男子扱上衽被髮徒跣婦人去冠被髮不徒跣諸有服者皆去華飾乃復侍者一人以死者之上服嘗經衣者左執領右執腰升屋中嚮北向招之三呼曰某人復畢卷衣降覆尸上男女哭擗無數乃立喪主主婦護喪司書司貨護喪命匠擇木為棺或已有棺則不再治訃告於親戚朋友執事者設幃及牀遷尸其上南首覆以衾即牀而

奠奠訖掌事者掘坎於屏處潔地乃陳襲衣於堂東壁下及飯含沐浴之具侍者以湯入喪主以下皆出幃外北面侍者沐髮櫛之晞以巾撮為髻抗衾而浴拭以巾剪爪并沐浴餘水巾節棄於坎而埋之侍者設襲牀於幃外施薦席褥枕先置深衣大帶袴襪汗衫之類於其上遂舉以入置浴牀之西遷尸其上悉去病時衣及復衣易以新衣徙尸牀置堂中間喪主以下就位而哭喪主坐於牀東衆男子應服三年者坐其下皆藉以藁同

姓期功以下各以服次坐於其後皆西向南上尊行以長幼坐於牀東北壁下南向西上藉以席薦主婦衆婦女坐於牀西藉以藁同姓婦女以服為次坐於其後皆東向南上尊行以長幼坐於牀西北壁下南向東上藉以席藁妾婢立於婦女之後別設幃以障內外異姓之親丈夫坐於帷外之東北面西上婦人坐於幃外之西北面東上皆藉以席以服為行無服者在後若內喪則同姓丈夫尊卑坐於帷外之東北面西上異姓丈夫坐

於帷外之西北面東上乃含喪主哭盡哀左袒自前扱於腰之右盥手執錢廂以入侍者一人插匙於米盥執以從置於尸西以幘巾徹枕覆面喪主就尸東由足而西牀上坐東面舉巾以匙抄米實於尸口併實以錢侍者加幅巾充耳設幘目納履乃襲深衣結大帶設握手覆以衾置靈座設魂帛立銘旌諸子三日不食期九月之喪三不食五月三月之喪再不食

小殮

死之明日厥明執事者陳小殮衣衾於堂東北壁下設
桌子於阼階東南置奠饌及盂注於其上巾之設盥盆
帨巾各二於饌東設小殮牀施薦席褥於西階之西鋪
絞衾衣舉之升自西階置於尸南先布絞之橫者三於
下乃布縱者一於上侍者盥手舉尸男女共扶助之遷
於牀上先去枕而舒絹疊衣以藉其首乃卷兩端以補
兩肩空處又卷衣夾其兩脛取其正方然後以餘衣掩
尸左衽不組裹之以衾而未結其絞未掩其面蓋孝子

猶欲見其面也殮畢覆以衾喪主主婦憑尸哭擗男子袒而括髮齊衰以下袒而裂布以免婦人亦用麻繩髻髻乃遷尸牀於堂中執事者舉饌升自阼階至靈座前祝焚香洗盞斟酒奠之喪主以下哭盡哀乃代哭不絕聲

大殮

小殮之明日執事者陳大殮衣衾奠具如小殮之儀舉柩入置於堂中少西侍者置衾於棺中垂其裔於四外

侍者與子孫婦女俱盥手掩首結絞共舉尸納於棺中
實生時所落髮齒及所剪爪於棺角又揣其空缺處卷
衣塞之務令充實先掩足次掩首次掩左次掩右令棺
中平滿喪主主婦憑哭盡哀乃加蓋下釘覆柩以衣設
靈牀於柩東乃奠喪主以下各歸喪次

成服

大殮之明日厥明五服之人各服其服入就位然後朝
哭相弔如儀成服之日喪主及兄弟始食粥妻妾及期

九月者蔬食水飲不食菜果大功以下異門者各歸其家自是每日晨起喪主以下各服其服入就位尊長坐哭卑幼立哭

朝夕奠

每日清晨侍者設盥櫛之具於靈牀側奉魂帛出就靈座然後朝奠執事者執饌祝盥手焚香斟酒喪主以下再拜哭盡哀食時上食至夕進夕奠如朝奠儀喪主以下奉魂帛入就靈牀哭盡哀朝夕之間哀至則哭朔日

之奠如朝奠之儀時物之薦如上食之儀

弔奠賻

凡來弔者必素服奠用香茶燭酒果賻用錢帛先具刺
通名乃入喪主哭以俟護喪出迎賓賓入至廳事進揖
曰竊聞某人傾背不勝驚怛敢請入酹并申慰禮護喪
引客入至靈座前哭盡哀再拜焚香跪酹茶酒俯伏興
護喪止哭者祝跪讀祭文奠賻狀於賓之右畢興賓主
皆哭盡哀賓再拜喪主哭出西向稽顙再拜賓亦哭東

向答拜進曰不意凶變某親奄棄色養伏惟哀慕何以堪處喪主對曰某罪逆深重禍延某親伏蒙奠酌并賜臨慰不勝哀感又再拜賓答拜又相向哭盡哀賓寬譬喪主曰修短有數痛毒奈何願抑孝思俯從禮制乃揖而出喪主哭而入護喪者送至廳事茶湯而退喪主以下止哭

擇地祭后土

三月而葬擇地之可葬者土色光潤草木茂盛之處即

為美地又須慎五患使他日不為道路不為城郭不為溝池不為貴勢所奪不為耕犁所及乃可世人多拘俗師陰陽之說既擇年月日時又擇山水形勢以為子孫貧賤富貴壽夭賢愚盡繫於此至有終身不葬或累世不葬棄捐不葬者悖禮傷義無過於此既得地乃擇日開塋域祠后土南向設神位設盞注酒饌於其前又設盃盆悅巾於其東南告者吉服入立於神位之前北向執事者在其後東上皆再拜告者與執事者皆盃悅執

事者一人取酒注西向跪一人取盞東向跪告者斟酒
反注取盞酌於神位前俯伏興少退立祝執版立於告
者之左東向跪讀曰維某年歲月朔日辰某敢告於后
土氏之神今為某親營建宅兆神其保佑俾無後艱謹
以清酌脯醢祇薦於神尚享訖復位告者再拜祝及執
事者皆再拜乃徹遂穿壙作灰隔造冥器刻誌石備大
興作神主以俟發引

發引

發引前一日執事者設饌如朝奠祝斟酒訖北面跪告
曰今以吉辰遷柩敢告俯伏興喪主以下哭盡哀再拜
乃遷柩役者入婦人退避喪主及衆兄弟斂杖立視祝
以箱奉魂帛導柩前行喪主以下從哭男子由右婦人
由左重服在前輕服在後服各為序侍者在末無服之
親男居男左女居女右皆次喪主主婦之後遂遷於廳
事執事者布席役者置柩於席上祝設靈座及奠於柩
前向喪主以下就位坐哭藉以薦席乃代哭如小殮之

前親賓致奠賻者其儀並如初喪時日晡時設祖奠祝
斟酒訖北向跪告曰永遷之禮靈辰不留今奉柩車式
遵祖道俯伏興厥明輿夫納大輿於中庭執事者徹祖
奠祝北面跪告曰今遷柩就輿敢告遂遷靈座置旁側
召役夫遷柩就輿喪主從柩哭視載婦人哭於帷中載
畢祝帥執事者遷靈座於柩前南向乃設遣奠奠畢執
事者徹奠祝奉魂帛置靈車別以箱盛主置魂帛後婦
人蓋頭出帷降階立哭守舍者哭辭盡哀再拜柩行冥

器銘旌等前導喪主以下男女哭步從尊長次之無服之親又次之賓客又次之塗中遇哀則哭未至墓執事者先設靈幄在墓道西南向親賓次在靈幄前十數步婦人幄在靈幄後墻西冥器等至靈車至祝奉魂帛就幄座遂設奠而退執事者先布席於墻內柩至脫載置席上北首執事者取銘旌去扛置其上喪主男女各就位哭賓客拜辭而歸乃窆喪主兄弟輟哭臨視喪主奉玄纁置柩旁再拜稽顙在位者皆哭盡哀加灰隔內外

蓋實以灰乃實土而漸築之祠后土於墓左如前儀藏
冥器下誌石復實以土而堅築之乃題主以生時所稱
為號題畢祝奉置靈座而藏魂帛於箱中炷香斟酒執
版出於喪主之右跪讀之云孤子某母云哀子敢昭告於某
親府君曰形歸窀穸神返室堂神主既成伏惟尊靈舍
舊從新是憑是依畢復位喪主再拜哭盡哀止祝奉神
主升車執事者徹靈座遂行喪主以下哭從如來儀留
子弟一人監視實土以至成墳

反哭

喪主以下奉靈車在途徐行哭至家哭奉神主入置於靈座喪主以下哭於廳事遂詣靈座前哭盡哀有弔者拜之如初期九月之喪者可以飲酒食肉惟不與宴樂小功以下大功異居者可以歸

虞

葬之日日中而虞或墓遠則但不出是日可也柩既入壙掌事者先歸修虞事具饌於堂東既沐浴喪主以下

內外俱詣靈座所喪子及諸子倚杖於室戶外內外俱哭掌饌者以饌入設於靈座前降出贊者請喪主止哭盥手詣靈座前以盞跪奠酒俯伏興西向立內外哭止祝進立於靈座右跪讀祝文曰維年月朔日辰孤子某敢昭告於考某人之靈日月遄邁奄及反虞叩地號天五情糜潰謹以清潔庶羞哀薦虞事尚享祝興喪主哭再拜退復位內外哭盡哀喪主以下出杖降自西階就次妻妾女子子還別室少頃徹饌祝取魂帛帥執事者

埋於屏處潔地罷朝夕奠遇柔日再虞遇剛日三虞

卒哭

三日而卒哭其日夙興掌事者具饌於堂東內外各衰服贊者引喪主以下俱杖升立哭於靈座東西向南上婦人升詣靈座西東向南上內外俱就位哭贊者升自東階入徹夕奠出執饌者以饌升設於靈座前贊者引喪主降盥手訖進詣靈座前以盞跪奠酒俯伏興少退西面立祝入立於靈座南北面內外哭止跪讀祝文曰

維某年某月某朔日辰孤子某敢昭告於考某人

母則曰哀

子曰姓某氏

日月不居奄及卒哭叩地號天五情糜潰謹以

清酌庶羞哀薦成事尚享祝興喪主再拜哭應拜者皆再拜哭盡哀喪主以下各還次自卒哭後朝一哭夕一哭乃諱名喪主蔬食水飲不食菜果寢席枕木

祔

卒哭之明日乃祔其日夙興執事者具器陳饌喪主以下入哭於靈座前乃詣祠堂奉所祔祖考之主置於座

內執事者奉祖妣之主置於座還詣靈座所哭祝奉新
主以行喪主以下哭從如從柩之次至祠堂門止哭祝
出主置於座喪主以下各就位贊者曰再拜在位者皆
再拜掌饌者以饌升各陳於座前設訖降出贊者引喪
主盥手酌酒先詣祖考妣位前祝辭云孝孫某謹以清
酌庶羞告於某祖之靈隣祔孫某人之靈內喪則云適
於某祖妣某人某氏之靈隣祔孫婦某人某氏次詣亡
者位前祝辭云薦祔事於先考之靈適於某考之靈尚

享喪主再拜興降出贊者引喪主詣諸座前各再拜乃復位贊者曰再拜在位者皆再拜祝先納祖考妣神主於龕中匣之次納亡者神主匣之奉之反於靈座喪主以下哭從如來儀

小祥

前期一日喪主及諸子皆沐浴具饌陳器設次陳練服於其所其日夙興祝入整拂几筵以出内外哀服喪主以下倚杖於階東俱升就位哭盡哀贊者引喪主杖就

次主婦以下各就次乃陳練服贊者引喪主倚杖如初
乃升內外俱升就位哭贊者引喪主盥手奠酒祝進立
於靈座右內外止哭祝讀祝文曰維年月朔日辰孤子
某敢告於考某人之靈歲月驚迫奄及小祥攀慕永遠
重增荼裂謹以清酌庶羞祇薦常事尚享祝興喪主哭
再拜退復位內外哭盡哀喪主以下出杖降自西階就
次妻妾女子子還別室自小祥之後止朝夕哭

大祥

前期一日喪主及諸子俱沐浴具饌陳器陳禪服於次
乃告遷於祠堂告畢改題神主而遞遷之虛東一龕以
俟厥明祝先入拂几筵降出內外於次哭盡哀掌事者
設饌於靈座前內外俱就位哭贊者引喪主盥手奠酒
祝立於靈座右跪讀祝文曰維年月朔日辰孤子某敢
昭告於考某人之靈日月逾邁奄及大祥攀慕永遠無
任荒踣謹以清酌庶羞祇薦祥事尚享祝興喪主哭再
拜退復位內外哭盡哀祝奉神主入於祠堂喪主以下

哭送掌事者徹靈座斷杖棄之屏處始飲酒食肉而復寢

禫

大祥之後間一月而禫既卜日前期一日喪主及諸子俱沐浴設神位於靈座故處乃陳器具饌其日夙興祝入拂拭几筵詣祠堂出奉神主置於座喪主及諸子妻妾女子子內外俱升就位哭贊者引喪主盥手奠酒祝立於神座右止哭跪讀祝文曰維年月朔日辰孤子某

敢昭告於考某人之靈禫制有期追遠無及謹以清酌
庶羞祇薦禫事尚享祝興喪主哭再拜退復位內外俱
哭盡哀送神主還於祠堂

奔喪改葬

右制與品官同

喪儀

洪武五年定

棺所用堅木油杉為上柏次之土杉松木又次之用黑
漆金漆不得用硃紅 冥器一事 功布以白布三尺

引柩柳車以衾覆棺 誌石二片如品官之儀 祭物
用豕力不及者隨家有無

喪禮禁令

洪武五年詔古之喪禮以哀戚為本治喪之具稱家有
無近代以來富者奢僭犯分力不及者揭借財物炫耀
殯送及有惑於風水停柩經年不行安葬宜令中書省
集議定制頒行遵守違者論罪如律 嘉靖十八年題
准士庶喪禮各稱家之有無以為厚薄時忌致祭亦隨

所有以伸追慕不以富侈不以貧廢巨家大族能遵禮
以為細民之倡者有司量加勸獎

禮部志稿卷三十三